



Ang Banagbanag

Ang Mantalaan sa Presensya ni Kristo

The Dawn in the Cebuano dialect

Ang Buhing Pulong

Yabeng Bersikulo:
“Ug human niya
isulti kini, iyang
gipakita kanila ang
iyang mga kamot ug
kilid. Busa ang mga
tinun-an nagmaya sa
pagkakita sa Ginoo.”
—Juan 20:20

Piniling Sulat:
Juan 20:1-23

ANG LEKSYON KARON NAG
DETALYE sa gipahayag ni Juan mahitungod sa pagkabanhaw ni Hesus gikan sa mga patay. Si Maria Magdalena miadto sa lubnganan sa panghinaot nga mahilogan niya ang lawas sa Ginoo ug mga lamas. Sa iyang pag-abot didto, nakita niya nga abri na ang lubnganan ug wala na ang lawas sa Ginoo. Ug nataranta siya nga migawas ug nakita niya si Pedro ug lain pang tinun-an nga gituhoan nga si Juan, ug siya miingon kanila, “Ilang gikuha ang Ginoo gikan sa lubnganan, ug wala kami mahibalo kon diin nila siya gibutang.” (Juan 20:2) Busa si Pedro ug

Juan midagan paingon didto sa lubnganan. Nahikurat sila sa ilang nakita—“ang bendaheng panapton nahimutang didto, ... ug ang panapton nga gibutang sa iyang ulo nahilain ug nilukot na sa usa ka laing dapit.” (vss. 5,7) Bisan mitoo sila sa ilang nakita apan wala sila makasabot, ug sila namauli sa ilang panimahalay. Sa pagsulat niini nga mga panghitabo sa daghang mga katuigan, si Juan nagkanayon, “Kay wala pa man sila makasabot sa kasulatan nga siya kinahanglan mobangon gikan sa mga patay.”—vs. 9

Si Maria nga naghilak sa iyang pinalangga nga Ginoo nagpabilin didto sa lubnganan ug nakita niya ang duha ka manolunda nga nangutana kaniya ngano nga naghilak siya, ug si Maria mitubag “Ilang gikuha ang akong Ginoo ug wala ako mahibalo kon diin nila siya gibutang.” (vs. 13) Ug si Maria milingi ug nakita niya ang usa ka tawo nga sama sa hardinero niadtong lugara. Iyang gipangutana kon iya ba nga gibalhin ang lawas, kay iya kining kuhaon ug ibalhin sa lain nga lugar. Ug ang sunod nga panghitabo maoy usa ka makatandog nga pahayag. Ang hardinero miingon kaniya, “Maria..milingi siya ug mingon kaniya, Rabboni: nga

nagkahulogang “Magtutudlo.” (vs. 16) Kining maong hardinero mao mismo ang Nabanhaw nga Kristo, ug ang pagkaila ni Maria kaniya pinaagi sa pagtawag kaniya sa iyang ngalan nga “Maria.” Nadunggan na niya sa makadaghan ang pagtawag sa iyang ngalan kaniadto sa iyang pag ministro ug busa iyang nailhan. Ang iyang kasinatian nagpatalinghog balik sa mga gisulti ni Hesus nga siya susama sa usa ka magbalantay sa mga karnero ug “pagatawgon niya sa ngalan ang iyang kaugalingong mga karnero ug pagagiyahan sila paingon sa gawas.”—Juan 10:3

Si Hesus miingon kang Maria, “Ayaw ako pagkupti, kay wala pa ako makasaka ngadto sa Amahan. Apan adtoa ang akong mga igsoonn ug ingna sila nga , Ako musaka ngadto sa akong Amahan ug inyong Amahan ug ngadto sa akong Diyos ug inyong Diyos.” (Juan 20:17) Unta nakinaiya na ni Maria Magdalena ang mokapot sa Magtutudlo ug magpabilin uban kaniya, karon nga nahibaloan niya nga dili na siya patay. Apan, siya mismo wala usab makasabot sa kinatibuk-ang kahulugan sa mga panghitabo. Si Hesus mipasabot kaniya nga ang iyang tawhanong panagway temporaryo lamang kini ug sa dili madugay Siya musaka ngadto sa iyang Amahan, dili siya angayan nga mokapot kaniya sumala sa iyang pagkatawhanon aron dili siya masakitan pag-usab inig mosaka na siya. Si Hesus nag sugo kang Maria Magdalena nga moadto sa ubang tinun-an ug ipahibalo nga siya nabanhaw gikan sa mga patay. Mitoo si Maria sa iyang Magtutudlo ug iya silang giingnan “nakita ko ang Ginoo.”—vs. 18

Ug sa pagkagabii sa mao nga adlaw, si Hesus milagroso nga nagpakita sa mga tinun-an ug misulti kanila, “And kalinaw maanaa kaninyo.” (vs. 19) Ang mga pulong sa atong yabeng bersiculo nagpakita ug kalipay ug himaya sa tanang nga tinun-an, tungod kay ilang nahibaloan nga ang ilang Magtutudlo ug Ginoo nabanhaw na gikan sa mga patay. Kini nga mga pulong nagalanog kanato karon, “Siya nabanhaw!”—Matt. 28:6

Paghinlo sa Templo

Yabeng Bersikulo:

***“Ug siya [Hesus]
miingon sa mga
nagbaligya ug mga
salampati: kuhaa
ninyo dinhi kining
mga butanga!***

***Ihunong na ninyo ang
paghimo sa balay sa
akong Amahan nga
balay sa mga tinda.”***

—Juan 2:16

Piniling Sulat:

John 2:13-22

SI APOSTOL PABLO
MIPAHAYAG mahitungod kang Hesus nga siya gipanganak sa usa ka babaye ug nailalom sa balaod. (Gal. 4:4) Isip usa ka Hudeo ubos sa balaod, gikinahanglan nga magpabilin ang mga kapistahan nga gimando ilalom sa kasabotan. Dinhi niining mao nga panghitabo nga atong gitun-an karon, nakita si Hesus sa Herusalem sa panahon sa pagsaulog sa mga Hudeo sa Pista sa Passover. Sama sa atong gidahom sa usa ka matinud-anon nga nagtuman sa sugo, si Hesus miadto diretso sa templo, ang sentro sa Israel nga pagasimbahan.

Ang pahayag nagaingon nga sa iyang pag-abot, nakita ni Hesus kadtong mga nagabaligya ug mga karnero, baka ug

mga salampati ingon man ang mga magpapatigayon ug salapi sa ilang mga lingkoranan.” (Juan 2:14) Niadtong panahona sa tuig kung moadto ang mga Esraelita sa Herusalem para saulogon ang kapistahan ila usab ginahimo ang mga paghalad. Ang katuyoan sa mao nga Balaod nga una gihatag sa Diyos kanila mao nga kada pamilya mag atiman sa hayop o halad para sa maong mga okasyon. Sa kadugayan, nakita sa mga Hudeong lideres ang oportunidad nga makanegosyo, makabaligya niining mga butanga sa mga tawo diha mismo sa Templo, dili na mahasol ang mga tawo sa pagdala ug mga hayop o bisan unsa pa nga butang nga angay nilang ihalad sa ilang halayo nga panaw paingon sa Herusalem. Kapatas-an nila ang presyo sa mga baligya ug aduna nay buhis ug ang mga naka benepisyo sa kita niini mipadulong sa bulsa sa mga relihiyosong lider sa Israel.

Sa dihang nakita kini ni Hesus diha sa Templo, Siya, “naghimo ug latigo nga pisi, giabog niya ang tanan nga may mga karnero ug mga baka pagawas sa Templo, ug giyabo niya ang mga sensilyo sa mga tig ilis ug salapi ug gipanglintuwad niya ang ilang mga lamesa; ug siya miingon sa mga nagbaligya sa mga salampati: kuhaa ninyo kining mga butanga! Ihunong na ninyo ang paghimo sa balay sa akong Amahan nga balay sa mga tinda!” (vss. 15,16) Sa susama nga pahayag sa Mateo 21:13, mas mabug-at pa nga pinulungan ang nakasulat niinin: “Ang akong balay pagatawgon nga balay nga ampoanan, apan gihimo ninyo kini nga usa ka langob sa mga tulisan”

Ang makasasalang kahimtang kung diin si Hesus kusganon nga nagasaway adunay duha ka hinungdan. Una, nakita niya ang kahakog sa mga relihiyosong mga lideres sa sobra ka taas nga presyo ug buhis sa mga hayop ug uban pang halad nga kinahanglan para sa pagtuman sa balaod sa kapistahan. Sila mga “kawatan” nga naghimo sa ilang negosyo sa “balay alampoanan.” Ikaduha, mao nga gitugotan sa katawhan nga sila mamahimong parte niini. Wala na hatagi nila ug bili nga sila mismo ang magdala sa ilang halad para sa Diyos. Andam silang mobayad ug mahal dugangan pa sa taas nga buhis dili lamang sla mahasol sa pagdala sa mga butang. Andam silang mobayad sa mg namunuan para lamang maapil niadtong mga nagtuman sa relihiyosong Balaod.

Ang mga tinun-an ni Hesus pagkakita sa gihimo sa ilang Magtutudlo, “nahinumdom nga kini nahisulat:kainit alang sa imong balay maglamoy kanako.” (Juan 2:17) Bisan nagpakita si Hesus sa iyang kasuko sa pag paaron ingnon nga nakita niya didto sa Templo, ang iyang “kainit” didto naka direkta sa positibo nga paagi sa balay sa iyang Amahan nga girepresentar sa Templo. Si Apostol Pablo nag sulti kanato nga sa kamatouran, si Hesus ug ang iyang simbahan mao ang tinooray nga Templo. Dinhi niining simbolo nga templo nga diin si Hesus adunay dako nga kainit ug tinguha nga kini siya makumpleto sa dakong pagsalig.—Efeso 2:19-22

Babaye sa Samaria

Yabeng Bersikulo:

***“Bisan kinsa ang
magainom sa tubig
nga akong igahatag
kaniya dili na gayod
pagauhawon pa,
hinoon ang tubig nga
akong igahatag kaniya
mahimong usa ka
tuburan sa tubig diha
kaniya nga
magabuswak aron
mohatag ug
kinabuhing walay
kataposan.”***

—Juan 4:14

Piniling Sulat:

Juan 4:1-42

unta niya ug tubig nga buhi.”(vs. 10) Kini nga mga pulong nakapalibog ug maayo sa babaye nga mitubag, para makakalos ug tubig, gikinahanglan ni Hesus ug timba tungod kay lawom ang atabay, ug iya gipangutana kung asa siya magkuha ug maayong tubig kondili nagagikan lamang sa mao nga atabay. Si Hesus mitubag, “Kining atabaya hinatag sa among katigulangan nga si Jacob ug siya ug ang iyang mga anak ingon man ang iyang mga kahayopan miinom gikan niini, labaw ka pa ba diay kang Jacob?”—vs. 12

SAMTANG NAGBYAHE PAULI sa Galilea pagkahuman sa Pista sa Passover, si Hesus nakaagi sa rehiyon sa Samaria ug nakaabot didto sa lugar nga tuburan ni Jacob. (Juan 4:4,5) Gikapoy sa iyang byahe, milingkod siya sa tuburan. Gipadayon sa pahayag, “Miabot ang usa ka babaye nga taga Samaria aron sa pagkalos ug tubig: Si Hesus miingon kaniya, hatagi ako ug mainom.” (vs. 7) Kini nga hangyo naka pahingangha sa babaye nga mitubag, “Naunsa ba nga ikaw, bisan usa ka Hudeyo nangayo kanako’g mainom, nga ako babayeng Samaritanon man? Kay ang mga Hudeyo wala may pagpakiglalot sa mga Samaritanon?”—vs. 9

Si Hesus mitubag, “Kon imo pang nahibaloan ang walay bayad nga gasa sa Diyos ug kon kinsa kining nagsulti kanimo, Hatagi ako’g mainom, mangayo ka unta kaniya ug hatagan ka

Ang gipasabot ni Hesus sa “gasa sa Diyos” mao ang “buhing tubig” nga iyag gipamulong. Apan dili kini literal nga tubig gikan sa asa nga atabay. Mao kini siya ang tubig sa Pulong sa Kamatuoran nga maoy maghatag ug spiritual nga kinabuhi para sa mga moambit niin. Kini nga Pulong sa Kamatuoran mao ang mga pulong nga migawas sa iyang mga ngabil sa dihang siya nagasangyaw. Mao kana ang “gasa sa Diyos” tungod kay libre kini niyang gihatag sa tanan nga ag dalunggan naminaw. Si Apostol Pablo nag tudlo sa “buhing tubig” nga Pulong sa Kamatuoran, nagpahayag aduna kini pagkabalaanon ug pagpanghinlo nga epekto sa simbahan. Miingon siya, “Nga siya (Hesus) mobalaan ug mohinlo sa Iglesia sa paghugas niini sa tubig pinaagi sa pulong.”—Efeso 5:26

Gipasabot ni Hesus sa babaye, “Ang moinom niining tubiga uhawon pag-usab.” (Juan 4:13) Midugang pa siya pag ingon gikan sa atong yabeng bersikulo, nga ang tubig nga iyang gihatag, ang tubig sa Pulong, makapatagbaw sa kauhaw sa kamatuoran sa kang bisan kinsa nga gustong masayod niini. Gipahayag ni Hesus nga kadtong moambit sa “buhing tubig” sila mismo mahimong “tuburan sa tubig.” Kini nga atabay dili na kinahanglan nga kaloson pa. Mamahimo kini siya nga sapa nga magabuswak diha kaniya. Ug dinhi, ang babaye mahinamon nga mitubag, “Senyor, hatagi ako niini nga tubig.”—vs. 15

Adunay duha ka pagpasabot niining mao nga hunahuna sa iglesia sa “atabay sa tubig nga nagabuswak ngadto sa kinabuging dayon.” Una, sa pag ambit nato sa tubig sa Pulong sa Kamatuoran ug tugotan nga magahimo ug pagbalaan kanato, kini siya mahimong tipik sa atong pagka tawo. Kini siya mahitabo nga ang Pulong sa Kamatuoran makita pinaagi sa atong sinultihan, linihokan, ug ehemplo sa usa’g usa ug sa kinatibuk-an. Kini nga proseso sa pag uswag, kung hugot ang paghimo niini, modala kanato ngadto sa “kinabuhing walay katapusan.” Ikaduha, ang gibayaw nga iglesia sa umalabot nga gingharian ni Kristo magahatag ug pareho nga tubig sa kamatuoran sa tanang katawhan. Ang tanan nga “giuhaw” (Pinadayag 22:17) para niini, ug pinaagi niini mabalaan, ug mapadulong sa “kinabuhing walay kataposan” dinhi niining kalibotan.

Ang Pag-Ayo sa Tawong Buta

Yabeng Bersikulo:
“Pipila sa mga Pariseo
miingon, dili siya tawo
nga gikan sa Diyos kay
wala man siya
magtuman sa
igpapahulay, ang uban
miingon, unsaon man
sa usa ka tawong
makasasala paghimo
niining matanga sa
milagro? Ug nabahin
sila.”

—Juan 9:16

Piniling Sulat:
Juan 9

SA GIPAHAYAG SA ATONG LEKSYON KARON, Si Hesus nakakita ug usa ka tawong buta sukad sa pagkahimugso. Ang iyang mga tinun-an nagtoo nga ang iyang pagkabuta tingali silot sa iyang nahimo o nahimo sa iyang ginikanan nga sala.(Juan 9:2) Si Hesus miingon dili kana mao ang hinungdan (vs. 3), Nasayod siya sa kamatuoran pinaagi sa kinatibuk-ang pahayag sa Pulong sa Diyos. Ang pagkabuta niini nga tawo ingon man ang tanan nga mga sakit sa katawhan bisan ang kamatyon mismo maoy resulta sa pagsupak sa atong unang ginikanan sa paraiso sa Eden ug ang silot gipahamtang nganha kanila. (Gen. 2:16,17; 3:17-19) Kini nga silot apil na ang mga lawasnonong balaatian sama sa pagkabuta ug uban pang mga sakit, napasa ngadto sa sunod nga mga henerasyon tungod kay ang

tanang tipik man sa nalaglag nga kaliwat ni Adan.

Gipasabot ni Hesus sa iyang mga tinun-an nga ang iyang sunod nga pagahimoon usa ka ehemplo sa “mga buhat sa Diyos.” (Juan 9:3) Siya miingon nga ang iyang misyon mao ang paghimo sa mga “buluhaton sa Diyos nga nagpadala kaniya,” ug sa ingon niini, siya ang “Kahayag sa Kalibotan.” (vss. 4,5) Kini nga kahayag makabenepisyo sa iyang mga tinun-an, para motabang kanila nga masayran ang katuyoan sa iyang mga gibuhad. Atong masabtan, naamgohan sa iyang mga tinun-an nga ang buhat sa pagpang ayo nga gihimo ni Hesus mao ang hulagway sa dako nga “buluhaton sa Diyos” nga pagahimoon sa iyang umalabot nga gingharian dinhi sa yuta.Si Juan misulti kabahin sa ubang dagkong

buluhaton nga nagkanayon, “Pahiran sa Diyos ang tanang luha sa ilang mga mata, ug wala nay kamatayon o kasubo, paghilak o kasakit kay nahanaw naman ang daang mga butang, unya ang naglingkod sa trono miingon, gibag-o ko na ang tanang mga butang.”—Pinadayag 21:4,5

Ang lain pang imortanteng leksyon mao ang pamaagi sa pag ayo ni Hesus sa tawong buta. “Si Hesus nangluwa sa yuta ug naghimog lapok ginamit ang laway. Unya gihidhiran niya sa lapok ang mata sa tawo ug giingnan, lakaw panghila-os didto sa linaw sa Siloam. ...ug milakaw ang tawo ug nanghila-os ug unya mibalik siya nga nakakita na.”(Juan 9:6,7) Dinhi, atong makita ang parte nga nakab-ot ni Hesus— paghilog sa mata sa tawong buta. Aduna usab buhat para sa buta—siya moadto sa linaw sa Siloam ug manghila-os. Pinaagi lamang sa pag kab-ot nila sa ilang mga buluhaton nga nakakita ang buta. Kini naghulagway nga ang pag ayo sa balatian sa tawo, dili lamang pisikal ingon man usab ang sakit sa batasan, nagkinahanglan buhat sa Diyos ingon man usab niadtong paga ayohon.

Ang kabahin ni Hesus sa pag-ayo sa katawhan gipakita diha sa paglukat, kung diin si Adan ug ang iyang mga kaliwat nahigawas sa silot. Iyang gilukat pinaagi sa “paghilog” sa Labaw nga Balaan (Dan. 9:24), ug dinhi natagbaw ang hustisya sa Diyos. Ang parte sa katawhan niini nga buluhaton, sa dihang nakagawas na sa silot mao ang pag kooperar sa “paghugas” sa mga nahabiling lama sa sala sa ilang kinaiya.

Ang yabeng bersikulo naga pakita nga ang mga lider nga Hudeyo wala mahimout sa maanindot nga kahulogan sa mga gihimo ni Hesus. Mapasalamaton kita, hinoon nga nasabtan nato kini nga mga butang ug atong masulti uban sa buta nga naayo, “Buta ako kaniadto apan karon makakita na.”—John 9:25